
ҚАЛБИ ПОК, КЎНГЛИ ЭЗГУЛИК БИЛАН ТЎЛГАН СЎХЛИКЛАР ДАВЛАТИМИЗ РАЎБАРИНИНГ ДОИМИЙ ЭЪТИБОРИДАДИР: ВИЛОЯТ ҲОКИМИ ХАЙРУЛЛО БОЗОРОВ СЎХ ТУМАНИДА БЎЛДИ

Вилоят ҳокими Хайрулло Бозоров вилоят секторлари ҳамда ҳарбий идоралари раҳбарлари, турли вилоят бошқарма ва ташкилотлари мутасаддилари билан биргаликда Сўх туманида бўлиб, иқтисодий-ижтимоий ва бошқа соҳаларда туманда амалга оширилаётган ишлар билан танишди.

Вилоят раҳбари дастлаб Соҳибкор маҳалласида бўлиб, бу ерда давлат-хусусий шериклик тамойили асосида барпо этилган янги МФЙ биносининг тантанали очилиш маросимида иштирок этди.

Тадбирда сўз олган вилоят ҳокими, Инсон қадри учун қаратилган бугунги давлат сиёсатининг амалий натижалари Сўх туманида ҳам яққол намоён бўлаётганини қайд этди. “Қалби пок, кўнгли эзгулик билан тўлган сўхликларнинг ҳаётларини қулайлаштириш, туманни комплекс ижтимоий-иқтисодий ривожлантириш, янги иш ўринлари яратиш, маҳаллаларни обод қилиш давлатимиз раҳбарининг доимий эътиборларидадир” деб таъкидлаган Хайрулло Бозоров, яқинда Сўх туманида асфальт ётқизилмаган, ичимлик суви тармоғи тортилмаган маҳалла қолмаслигини, Риштон-Сўх йўлининг Қирғизистондан ўтган қисмини янгидан асфальтлаш учун маблағ ажратилгани ва яқин муддатда ишлар бошлаб юборилишини, туманда 100 ўринли янги сиҳатгоҳ ҳамда замонавий болалар дам олиш маскани қурилиши учун Президентимиз кўрсатмалари билан катта маблағ ажратиб берилганини маълум қилди.

Ўзбекистон Президентининг 2020 йил 8 августдаги “2020-2021 йилларда Фарғона вилоятининг Сўх туманини комплекс ижтимоий-иқтисодий ривожлантириш чора-тадбирлари тўғрисида”ги қарори ижроси доирасида маҳаллий тадбиркорларнинг ўз маблағлари ҳамда вилоят маҳаллий бюджетининг қўшимча манбалари ҳисобидан барпо этилган янги маҳалла биноси учун 480 миллион сўмдан зиёд маблағ сарфланди.

[Бизни ижтимоий тармоқларда кузатинг Facebook,](#)
2021-10-16 08:56:14